

## Ungerwägs

Dä Zug won i drinn sitze, hautet gar säute bis nie  
und i frage mi, was alles a mir verbizogen isch bishär  
Dr Wunsch isch mängisch gross, a dere Notbräms z' zieh  
bekannte Wäge z folge, faut mr schwär

**Bi ungerwägs und bis a ds Ändi vo dr Wäut,  
dürforsch i mänge Egge unger däm Himmuszäut.  
Jede Schritt uf mire Reis chönt, so wie jede Ougeblick,  
es Tor sy i d Freiheit uf em Wäg zum Glück.**

Zyt vergeit im Flug überem Wolchemeer  
immer witer flüg i rastlos, o mau hin und här  
und won i de o bi, da suech i chrüz und quer  
d Luft wird dünn und z Schnuufe faut mr schwär

Bi o scho ufem Schiff ar Reling gstange  
und ha Tröim versänkt im dunkublaue Meer und när  
han is gno wis isch und glich nid ganz verstange  
und grad wes eifach schynt, faut's mr dopplet schwär

**Bi ungerwägs und bis a ds Ändi vo dr Wäut,  
dürforsch i mänge Egge unger däm Himmuszäut.  
Jede Schritt uf mire Reis chönt, so wie jede Ougeblick,  
es Tor sy i d Freiheit uf em Wäg zum Glück.**

**Bi ungerwägs und bis a ds Ändi vo dr Wäut,  
dürforsch i mänge Egge unger däm Himmuszäut.  
Jede Schritt uf mire Reis chönt, so wie jede Ougeblick,  
es Tor sy i d Freiheit uf em Wäg zum Glück.**

Dä Zug won i drinn sitze, hautet gar säute bis nie